

Blaðamannafundur landbúnaðarráðherra haldinn í húsnæði Íshesta að
Sörlaskeiði 26, Hafnarfirði, föstudaginn 18. febrúar 2005 kl. 14:00

Ný skýrsla nefndar sem gert hefur úttekt á aðstöðu til hestamennsku á landsbyggðinni og sett fram tillögur um stuðning ríkissjóðs við uppbyggingu hennar

Þingmennirnir Jónas Hallgrímsson, Ísólfur Gylfi Pálmason, Einar Már Sigurðsson, Drífa Hjartardóttir, Vigdís M. Sveinbjörnsdóttir, Arnbjörg Sveinsdóttir og Þuríður Backman lögðu fram svohljóðandi tillögu til þingsályktunar á 128. löggafarþingi Alþingis “Alþingi ályktar að fela landbúnaðarráðherra að skipa nefnd sem geri úttekt á aðstöðu til hestamennsku á landsbyggðinni og leggi fram tillögur um stuðning ríkissjóðs við uppbyggingu hennar..” Tillaga þessa efnis var samþykkt á Alþingi, sbr. ályktun Alþingis frá 15. mars 2003.

Í kjölfar ályktunar Alþingis skipaði landbúnaðarráðherra nefnd sem falið var það hlutverk sem mælt var fyrir um í ályktun Alþingis. Nefndin var þannig skipuð:

Atli Már Ingólfsson, lögfræðingur í landbúnaðarráðuneytinu, sem nefndarformaður.

Ágúst Sigurðsson, þáverandi hrossaræktarráðunautur Bændasamtaka Íslands, núverandi rektor Landbúnaðarháskóla Íslands

Ásgeir Margeirsson, formaður mannvirkjanefndar Landssambands hestamannafélaga

Elías Bj. Gíslason, forstöðumaður upplýsinga- og þróunarsviðs Ferðamálaráðs Íslands

Guðný Jóhannesdóttir, þáverandi formaður íþróttá- og tómstundaráðs Akureyrarbæjar

Jónas Hallgrímsson, framkvæmdastjóri, sem jafnframt var einn af flutningsmönnum tillögunnar á Alþingi.

Nefndin hefur nú lokið störfum með útgáfu skýrslu með úttekt á aðstöðu til hestamennsku á landsbyggðinni þar sem jafnframt eru settar fram tillögur um stuðning ríkissjóðs við hestamennsku á landsbyggðinni.

Helstu tillögur nefndarinnar eru eftirfarandi:

1. Reiðhús. Nefndin leggur til að ríkisvaldið styrki sérstaklega byggingu reiðhúsa á ákveðnum stöðum á landsbyggðinni, skv. skilgreiningu nefndarinnar á slíkum mannvirkjum.

- **Reiðhöll á Akureyri.** Akureyri hlaut flest stig hjá nefndinni þegar skoðaðir voru þeir staðir þar sem óskað var eftir stuðningi við byggingu reiðhúss. Lagt er til að ríkið styðji við byggingu reiðhallar á Akureyri.

- **Reiðskemma í Borgarfirði.** Borgarfjörður hlaut næst flest stig hjá nefndinni þegar skoðaðir voru þeir staðir þar sem óskað var eftir stuðningi við byggingu reiðhúss. Lagt er til að ríkið styðji við byggingu reiðskemmu í Borgarfirði á Hvanneyri eða í Borgarnesi eftir samkomulagi heimamanna.

-**Reiðhöll á Fljótsdalshéraði.** Fljótsdalshérað varð í þriðja sæti hjá nefndinni þegar skoðaðir voru þeir staðir sem óskuðu eftir stuðningi við byggingu reiðhúss. Lagt er til að ríkið styðji við byggingu reiðhallar á Fljótsdalshéraði.

-**Reiðskemma á Hornafirði.** Hornafjörður varð í fjórða sæti hjá nefndinni þegar skoðaðir voru þeir staðir þar sem óskað var eftir stuðningi við byggingu reiðhúss. Lagt er til að ríkið styðji við byggingu reiðskemmu á Hornafirði.

-**Reiðskemmur á Snæfellsnesi og Ísafirði.** Snæfellsnes og Ísafjörður urðu í 5. – 6. sæti hjá nefndinni þegar skoðaðir voru þeir staðir sem óskuðu eftir stuðningi við byggingu reiðhúss. Lagt er til að ríkið styðji við byggingu reiðskemma á Ísafirði og á norðanverðu Snæfellsnesi.

2. Reiðleiðir. Nefndin leggur til að hætt verði að leggja reiðleiðir meðfram þjóðvegum eftir því sem frekast er kostur. Þess í stað verði þegar hafist handa við, í samstarfi við Landssamband hestamannafélaga (L.H.) og Vegagerðina að leggja reiðleiðir þar sem þær voru áður eftir því sem heimildir og kort mæla fyrir um, eða á nýjum stað, en ekki við þjóðveginn eða á helgunarsvæði hans. Gripið verði til aðgerða til að tryggja lagningu slíkra reiðleiða.

3. Bætt aðstaða meðfram reiðleiðum. Nefndin leggur til að um leið og reiðleið er lögð sé þess gætt að nauðsynleg aðstaða sé jafnframt byggð upp eða gert ráð fyrir henni.

4. Tenging áningarstaða með reiðleiðum. Nefndin leggur til að farið verði sérstaklega yfir það hvernig tengja megi vinsæla staði við stofnleiðir og héraðsleiðir, fornar og nýjar og veittir fjármunir til uppbyggingar slíkra reiðleiða.

5. Aukin framlög til reiðvega. Nefndin leggur til að framlög til reiðvega af Vegaáætlun verði tvöfölduð.

6. Sérstök fjárveiting af fjárlögum. Nefndin leggur til að ríkisstjórnin samþykki, í eitt sinn, sérstaka fjárveitingu á fjárlögum, umfram tekjur Vegasjóðs sem fjárframlag vegna átaks við gerð reiðleiða og mannvirkja tengdum þeim á landsbyggðinni.

7. Nefnd L.H. og Vegagerðarinnar. Nefndin leggur til að komið verði á fót nefnd skipaðri fulltrúum frá L.H. og Vegagerðarinni er geri tillögur að því hvernig sérstöku fjármagni vegna átaks í reiðvegamálum skuli varið.

8. Knapamerkjakerfið. Nefndin leggur til að ríkisvaldið styðji við uppbyggingu knapamerkjakerfisins. Kannað verði hvort hægt sé að koma slíkum stuðningi að í gegnum hið almenna menntakerfi landsins eða með öðrum hætti eftir því sem best nýtist verkefninu.